

馬首農言

馬首農言

咸豐五年夏四月

受業張金鏞謹題

馬首農言序

五方之氣候不齊故其樹藝亦各異先王所爲物土之宜而布其利也壽陽踞太行之項環山爲邑獨西北通黃嶺一峽故其氣候特寒穀雨播種秋分隕霜傳諸農諺者言稽事之尤艱也淳甫相國居邑之平舒村民風淳樸比戶勤農人無猗頓之資家有山樞之儉上自鮐背下至垂髻莫不以占晴雨力耕耘爲治生之務此農言一書所由作也其書先辨種植次及農器繼采古諺方言附以占驗之術畜牧之方水利救荒之策於農事本末旣賅備矣復錄前賢訓俗之文以敦規勸如戒淹喪禁囤積懲游蕩儆刻薄又於務本之中約舉大端與世指迷是有裨於風俗人

心豈可與齊民要術等書同類而觀哉夫晉人多居積善
行賈今漸有中於奢靡而入於匪僻者矣壽陽之士獨瘖
此天與以嚮義之資而使之無過也生斯土者誠知稼穡
之惟寶抑末技而重本圖庶幾灾禍不侵人登仁壽也夫

長洲彭蘊章敬題

馬首農言

幼從京宦稍長歸里五載家塾未親耒耜弱冠遊宦二十餘年還家如客遑問及田請假侍親讀禮守墓寒暑四周惟農是務農家者言質而不文因時度地各述所聞耳目既習徵驗亦久煩言碎辭以筆代口古馬首邑今日壽陽先疇世服詒自黃羊道光十有六年歲次丙申季春之月祁寯藻記

地勢氣候

壽陽縣居太行之頸項山脈西北自甯武忻州來至縣東北境枝分右出融爲縣治正幹引而南山之東爲桃水所導源又引而東南由平定州至樂平之西陡泉嶺則洞過

水導源處也全境之水惟東界南北芹泉東流爲桃水而歸滹沱餘皆匯趨城南合洞過以西注於汾

縣志

環壽皆山獨黃嶺一峽受西北風故氣特寒韓文公題壽陽驛詩云風光欲動別長安及到邊城特地寒不見園花兼巷柳馬頭惟有月團團至今有冷壽陽之諺穀雨後始布種秋分後卽隕霜農事艱難倍於他邑太安平舒兩村尤寒以地窪近河故也

種植

穀者樹藝之總名北方則專屬之梁而以梁之名移於稷又移稷之名混於黍於是梁稷黍三者言人人殊 國朝程徵君瑤田著九穀攷獨据許氏說又證以鄭氏周官九

穀注力破諸說之謬余參之目驗信其不誣今之所謂穀卽說文之禾也禾粟之有稾者也其實曰粟其米曰粱今之所謂高粱卽說文之稷也黏者爲秫故俗呼高粱爲秫秫呼其稽爲秫稽月令首種不入鄭注舊說首種謂稷今北方諸穀播種高粱最先粟次之黍麩又次之高粱最高大又先種故曰五穀之長故司農之官曰后稷因之爲五穀之總名因之爲祭穀之總名也唐蘇恭誤解陶通明稷與黍相似之云遂欲於黍中求稷乃曰本草載稷不載稌因以稌爲稷不知黍中之有稌猶稷中之有秫稻中之有秔北方稷稌音相邇稌奪稷名因謂稷稌一物而以黏不黏分黍稷失之矣說文糜稌互釋稷麩互釋其爲二物甚

明程說如是姑撮其畧知此乃可言種植矣

穀多在去年豆田種之亦有種於黍田者亦有複種者諺

云不怕重種穀只怕穀重種上聲蓋謂穀類不一苗有紅白當換

種也未種之先耕一次耙二次以多爲貴俗謂耕三耙四

鋤五徧八米二糠再沒變原穀雨後立夏前種之隰自立

夏至小滿皆可種原深二寸畝用子半升隰寸餘子半升

二三合農人下子多以半升計種畢以砵碾之地溼則俟乾然後碾

之恐有風鑽入壤子至六七日復碾之苗出土時蟲之傷苗者有

截白截青之名截青尙可俟其發生截白則宜改種勿遲

苗高寸餘原先鋤所謂早鋤一寸強如上糞是也隰宜間

去聲拔苗令稀不宜鋤鋤則苗已留成防其因溼而壞也尺餘則

可鋤矣臨伏再鋤以土壅根令其深固穀莠最多如黃顛
灰背老牛草之類皆宜鋤淨立秋至白露三鋤以去草至
秋分社時以手撥其瓣視有綠穀否無則熟可穫矣穫後
去其根犁之令地歇息

黑豆多在去年穀田或黍田種之萬勿複種諺云重複黑
豆子種穀無糞下子謂之子種一年一箇沒甚喫是也又云莊家種

黑十年九得蓋土宜黑豆宜多種也穀雨後先種原子三
半升犁深三寸隰子亦如之深則二寸深雖耐旱少不發
苗淺雖發苗後不耐旱原宜稠三四寸一苗隰宜稀亦不
過一尺苗低淺鋤之苗高深鋤之二徧亦以土壅根秋夏
黑白等豆皆然穫後旋耕以備來年種穀與高粱不可於

蕎麥地種諺云蕎麥見豆外甥見舅

麥種不一春麥於去年黑豆小豆田春分時種之種法有

二以犁耕而種者原子六半升隰七八半升地溼而肥一

京斗

俗以五升爲一
小斗亦曰京斗

至多矣宜淺不宜深俗云麥子犁深

一團齊根地喜堅實不喜懸虛俗又云麥種場是也耕畢

耙二次耙不厭多以鑿勾開地界而種者每畝下子畧多

於耕勾畢以足覆土踏之耕微深熟較遲勾微淺熟較早

耕者於出土時復耙之地既著實亦無串黃之慮

雨後麥
芽無力

不能出土黃芽長至
三四寸謂之串黃

勾者亦於出土時復踏之草麥與種

春麥同時畝用子十升拐麥畝用子六升草麥拐麥穫在

夏至俗謂得節不得節夏至喫大麥春麥至伏乃刈之俗

云麥子不受伏家氣謂熟在伏前也又云麥子傷鎌一張皮傷鎌謂刈大蚤也宿麥於秋分前後種之與春麥同法但耕微深耳

高粱多在去年豆田種之其田秋耕者爲上春耕者次之犁深二寸耙一次穀雨後種之深寸餘子半升至一升皆可切忌過深深則子粉矣種畢砲之苗高三四寸則鋤立苗欲疏二尺餘亦不爲遠尺五至稠再鋤時以土壅根肥地可留其支苗薄地則去之鋤不厭多多則去草且易熟熟以色之紅紫爲驗

小豆種法與黑豆同所異者黑豆先種原後種隰小豆先種隰後種原犁較黑豆宜深所謂小豆犁淺不如不點苗

小時以手間之原苗相距宜五寸隰雖一尺亦可立秋則
鋤鋤喜陰雨俗有乾鋤穀苗溼鋤豆細雨淋淋鋤小豆之
說至大小豌豆扁豆與種春麥同時皆係夏田紅豆不拘
遲早鋤忌午日菜豆與種小豆同時宜午鋤若鋤遇陰雨
多生旱蟲

黍有稌黍與種穀同時稌黍外又有大小白黍大小黑黍
大小紅黍之別大者先種後熟其粒大耐風小者後種先
熟不耐風於去年穀田黑豆田芒種時種之先耕一次宜
深種時再耕宜淺雖一寸亦可下子畝六七合耙二次先
以木板拖之恐其沒紋初出土葉如鼠耳若遇雨泥水貫其心則死謂之沒紋後復
砘之地喜勻和忌土塊俗云黍種湯未出土時雨亦不妨

俗又有黍子頂瓦出之說三四葉則間之留苗寸餘雙單相間俗云稠糜忽闌黍黑豆地中卧下狗鋤亦不必深驗老嫩如驗穀法

蕎麥多在本年麥田種之有先耕後以耬種者耕宜深二寸耬深止一寸種畢耙之有和糞點者耕止寸餘深點法有二點於犁溝者耕微淺點在稜背者耕微深有將子亂灑地面後以犁耕之以耙覆其種者三法皆忌大雨大雨則謂之涸傷俗有蕎麥不涸傷就拏布袋裝之語至亂灑者雖易結子熟時難挽蕎麥用手挽不用刈不如點種二法爲善

油麥多於去年黑豆田瓜田種之性喜溼布種之法原不過三半升陽則有四五半升者其種一種有蚤晚而穫亦

因之夏油麥與種春麥同時穫在初伏穫後其田種蕎麥則遲至秋分種宿麥爲宜與小豆同時種者俗謂之二不秋穫在處暑後與黍同時種者謂之秋油麥穫在秋分後種時以燒酒少許勻子其莖勁而有力不爲風靡下子若遇陰雨東風穗多黑煤宜忌點者居多苗高三四寸則鋤立苗與春麥宿麥同太疏則難熟矣

諺曰小滿前後安瓜點豆瓜類甚多栽時不甚相遠如中瓜則先栽倭瓜次之黃瓜甜瓜與葫蘆瓠子相繼並栽其法將子用溫水浸過撲於地上一入盆芽之芽之然後栽之其性蔓生且多支節葉下皆有一頭以手切去方不混條葫蘆切其正頂瓠子獨留正頂甜瓜則又切其正頂

留其支頂見瓜又切其支頂切時必正午方好黃瓜任其支蔓不用切頂圍以洎油爲最倭瓜宜多栽必須伏前埋條切去支節至伏則瓜朽爛立秋後雖多結實亦難黃熟蒜多栽於溼處俗有清明不在家之說多則以耨畫地少則以鑿子勾開地界不必過深稀五寸一種稠則三四寸亦可小滿鋤草芒種時於行隙中灑紅蘿蔔欲灑芥菜則俟初伏處暑起回辯之其有不分辨者謂之獨孤蒜灸用以承艾不患成瘡

余初得邑人張氏耀垣種植諸說復與同研友冀君乾詳細參考質之老農皆以爲然遂記之

穀之種不一一穗粒顆多寡不同以道光十四年秋收九

分計之灰穀一穗七十六瓣瓣百八十四粒或百六十粒
得八千九百八十九粒大白穀一穗七十九瓣瓣百一十
九粒或百粒得八千八百三十四粒小白穀一穗九十九
瓣瓣六十五粒或八十五粒得七千八百九十二粒小蛇
穀一穗九十三瓣瓣百粒或百二十粒得九千四百九十
二粒小黃穀一穗八十五瓣瓣百一十五粒或百二十粒
得九千八百三十五粒若準以大冇年所獲一穗萬粒有
過之無不及也諺曰春種一斗子秋收萬石糧信然

犁之淺深有法欲微深則向前稍送之欲微淺則向後稍
抹之欲大深則將上木貫打緊下木貫打鬆欲大淺則反
是其法不一以類推之欲察犁跡淺深於耕過土埋處手

創之乃見春犁宜淺秋犁宜深深不過二寸半淺不過一寸或寸餘然亦有特用深犁者地力不齊也今年耕墾明年耕隴則地力有餘矣

冀宜早運田中不可遲延三冬有暇日卽運之無暇日則至新春運之田在河外尤宜早運凍解路淖人力車力均難施矣運畢須於田中椎碎

凡犁田深不過六寸淺不過寸半山田四寸爲中河地秋三寸春二寸半秋犁較春犁深五分或一寸秋犁棱窄春犁棱寬秋一步七棱春一步六棱

碌碡壓地山田秋宜壓春宜磨磨似耙木齒形如鹿角平田春宜耙

秋宜犁山田乾燥恐熟土爲風吹去來年禾稼不長故用

壓用磨平田不須也

凡耬有糞耬

大小三箭有子耬

小三箭

凡穀初生三四葉先挑草次間苗

卽拔苗也平地河地皆用之雨多時尤要山地

不須次鋤苗

凡鋤深謂之樓淺謂之鋤先鋤後樓鋤主立苗欲疏樓則

擁土培本

俗謂創窩跌彈使雨水不散亦不畏風

自鋤至樓三次爲勤二次

亦可一次爲惰四次者田無草萌矣

凡穀田自秋犁始至來歲入倉止凡用人力二十餘次

犁秋田

俗名殺秋地

運糞

自始凍至開凍

耙春田

俗名打蕪頭

打土

塊

俗名打坨拉

打糞塊

俗名打瘤糞

散糞

或灑或溜或稜

犁春田

俗名

翻地耙

布種

碾砘

三石橫穿一木牽之俗名拉砘子

復砘

挑草

間苗

間去聲一
日揀苗

鋤

二鋤

三鋤

刈穫

捆載

切穗

打場

先以碌礮碾之再打
打穀枷板俗名拉戈

入倉

壽邑麥不宜多種大率十畝中種一畝

城北麥來自歸化
城又有東麥

黑

豆宜多種易收

太原池西黑豆
多販自壽陽

穀供一邑之食有餘販之

他邑南鄉人多因土厓爲窯積穀無霉爛之虞稻米來自太原縣所謂晉祠大米也油有麻油無香油石炭土產然質軟多煙不及平定之佳

蕎麥開花於七月十五日前後月下結子天陰則子難實蓋得陰氣而實也其性屬陰故寒

凡五穀皆有花畏雨穀花青黍花碧高粱花黃蕎麥花白黑豆花或淡紫或白小豆花黃扁豆花淡紫豌豆花深紫

杖杜詩云黍稷方
華箋云六月時

白蘿蔔花白紅蘿蔔花淡紫芥花黃茄花深紫瓜花黃

回回山藥花白回回白菜花黃

此二種近年始種

白菜花黃

農器

耒耜上句木也耜耂也犁墾田器也耒耜曰犁耜所以散

撥去芟渠疏之義也凡耕而後有耜勞

記到切

無齒耜也撻

打田簪也

於求切

槌塊器也

古竹切

礮

徒篤切

北方以石南

人以木耜而後有礮礮焉耩

落候切

車下種器也砵車砵石

礮也以木軸架礮爲輪故名砵車瓠種竅瓠盛種也牛軛

服牛具也

鑿

居縛切

劓田器也

楚治切

鍬也所以開渠者長鑿

仕杉切踏

田器也鐵搭其齒銳而微鉤似杷非杷屬土如搭也杙

屬與鍬畝異鐵杙惟宜土工木杙可掾初責切穀物以竹爲

之者謂之竹揚杙與江浙颺籃少異鑿犁之金也鑿胡瓜切鍤類起

土者也鑿開生地鑿耕熟地北方多用鑿南方皆用鑿鑿

蒲狄切犁耳也剡所間切平土器也剡呼鑊切耨足所耨金也

錢子踐切鈹也鈹七遙切似鍬非鍬殆與鏟同養苗之道鋤不如

耨力豆切耨不如剡楚簡切耨布各切耨別名也耨除草器也耨

鉏耨爲鉏柄也鉏立疇也鐙多鄧切鋤剡草具也鏟平削也

鉦知栗切穫禾穗刃也艾魚肺切穫器今之剡鎌也古艾從草

今刈從刀鎌力詹切刈禾曲刀也鑿蒲末切兩刃刈也剡卽計切

開荒刃也斧伐木刃也鋸解截木也斲查鎔切切草也礪磨

刃石也

杷蒲巴切鏤斂器也穀杷以攤曬穀耘杷以耘稻禾竹杷場

圃樵野間用之杷傳拔切無齒杷也所以平土壤聚穀實也

杈箝禾具也禾鉤斂禾具也比之手槌力展切甚速便也搭

爪如爪之搭物速於手挈也禾擔都濫切負禾具也連枷古牙切

擊禾器也

蓑雨衣也笠戴具也屣草履也屣麻履也

蓀徒弔切盛穀種器賁盛穀器筐竹器之方者魯竹器之圓

者畚音本土籠力重切也筥徒本切盛穀器兼筥市專切而

言也筥多露置可用盛糧筥臚在室可用盛種皆收穀所

先具者穀匣盛穀方木層匣也籬挈米穀器筥才何切造酒

造飯用之漉米又可盛食物也

都監切

盛米器也或作甌

瓦器也籃竹器無係爲筐有係爲籃箕簸箕也簸揚米去

糠也帚短者謂之條

亦作

帚長者謂之埽帚又有種生者

一科一帚謂之獨帚籠

所宜切

篩穀物可以除粗取精也箝

所交切

飯箝也南曰箕

於六切

北曰箝南方用竹北方用柳

按凡

竹器北方多用柳爲之

皆漉米器或盛飯所以供造酒食也篩穀箕

與袋同音土俗所呼

竹器颺

餘亮切

籃謂風飛也不待車扇又勝箕簸

種上聲篔簹盛種竹器也曬槩曝穀竹器也

杵曰舂也碓石舂也坳

居郎切

碓踏碓也槽碓受水以爲舂

也礪

力董切

礪穀器所以去穀殼也輾

女箭切

石礪礪穀也輾

古本切

輾世呼曰海青輾喻其速也颺

與章切

扇揚穀器場圃

用之者謂之扇車

按壽邑扇車大小二種小者謂之礮莫米扇大者謂之虎頭與此少異

切唐韻

石磴

五對也主磨曰臍注磨曰眼轉磨曰幹承磨

曰槃載磨曰牀凡磨上皆用漏斗油榨取油具也

倉穀藏

去聲

也有屋曰廩無屋曰庾庾露積穀也凡露積者

編草覆之謂之積苦困圓倉也京方倉也窖

古孝切

藏穀穴

也方曰窖墮

他果切謂狹而長

曰竇升十合量也斗十升量也斛

十斗量也夫量者躍於龠合於合登於升聚於斗角於斛

槩

工代平斛斗器也

釜煮器也甑炊器也筭甑筭也所以蔽甑底也

下澤車田間任載車也大車平地任載車也守舍看禾廬

也牛室耕牛爲寒築室納而阜之也

水柵排木障水也水閘開閉水門也陂野池也塘猶堰也
陂必有塘故曰陂塘翻車謂龍骨車也筒車流水筒輪也
戽候古切斗挹水器也桔槔挈水械也輓轆纏綆械也瓦竇
泄水器也浚渠引川水爲渠以資沃灌也陰溝行水暗渠
也井地穴出水也

水磨以水激磨隨輪轉也水礮水轉礮也水碾水輪轉碾
也機碓水搗器也缶汲水器也綆汲水索也

王楨農器圖譜摘其南北通用者節錄之其詳具本農
書中

農諺

農之有諺其來最古說文諺傳言也古者輶軒所采風謠

所遺片語隻句散在里鄙曩籍覲縷可得而言若黍稷無

成不能爲榮

國語

土上冒櫛陳根可拔耕者急發鄭氏注月令引農書

力勤十頃能致嘉穎

王嘉拾遺記

三月昏參星夕杏花盛桑葉

白河射角堪夜作犁星没水生骨

崔實四民月令引農語

蜻蛉鳴衣

裘成蟋蟀鳴嬾婦驚

月令注引里語

射的白斛米百射的元斛米

干酈道元水經注引諺語

陂汪汪下田良

水經注

欲得穀馬耳鏃子欲

富黃金覆

賈思勰齊民要術

椹厘厘種黍時

齊民要術注

坐賈行商不

如開荒溼耕澤鋤不如歸去耕而不勞不如作暴

王楨農書斯

竝至理恒言不涉纖俗其或發聲近鄙適用惟良雖有絲

麻無棄菅蒯以彼厘身從事樸野不文管子呂覽之篇汜

勝崔賈之說目未劉覽言輒符合自天時地利人情土俗

竝有徵信無假彫飾豈非循之則得違之則失者哉雖孔
門興不如之歎班氏有鄙者之譏小道恐泥壯夫不爲然
三變之禾取其顧本耦犁之法足以富民豈曰瓌屑槩以
略諸

打了春四十日擺條風風莫風不上身

春風不寒

打了春連

鞵單布裙

不著鞵

一年打兩春黃土變成金

驚蟄河開

又曰驚蟄河開河不開

河重凍穀重種

春寒河開復凍

驚蟄聞雷米如

泥

又驚蟄雷謂之雪裏雷主豐年

春分耩麥

春麥

春社燕來

春分有

雨病人稀

清明栽蒜

又曰清明不在家白露不在外謂種蒜收蒜時也

二月

清明有花三月清明無花

穀雨耩山坡

種穀山坡暖故早種

穀雨搶頭種

立夏種河灣

河地寒故遲種

立夏種胡麻九股

八格杈小滿種胡麻到秋只開花 麥望四月雨又曰麥望四節

雨蓋麥秀四節也 立夏不種黑豆謂黑豆 初一初二缺斤兩初三

初四麥彈黃初五初六霜降早初七初八打滿場初九初

十溢了場十一十二有餘糧四月占雨道光十一 四

月四麥挑旗五月端午麥秀齊 三月黑豆四月米謂納糧

四月八凍煞黑豆甲 小滿前後安瓜點豆 小滿麥

定胎胎麥節也 穀種至小滿 小滿花棉花不回家棉花遲種則不收

槐芽兒雞瓜種穀稀少 芒種急種黍夏至也不遲

芒種植黍生芽 芒種黍子急種穀謂重種者 有錢難買五

月旱六月連陰喫飽飯 夏至日得雨一點值千金 夏

至不種高山黍還有兩垧植糜子垧畝也 得節不得節夏

至喫大麥

又曰夏至喫角角謂豆角也

夏至不留秧

謂若蓮回回白

菜諸秧至此皆種

黑豆不識羞夏至開花立了秋 五八月小

盡晚田少種

謂霜降早

五月小必定好五月大必定怕小

暑喫角角大暑喫麥麥

豆角謂之角角金劉崑老瞻詩有厨香炊豆角之句

天河

掉角喫角角天河東西喫新米 夏至三庚入伏立秋五

戊爲社

有六戊者

麥子不受中伏氣

又曰麥子不受伏家氣

伏裏無

雨穀裏無米

頭伏搜滿罐油二伏搜半罐油三伏搜沒

來由

搜鋤之深也油粒飽湛也

頭伏蘿蔔末伏菜

又曰頭伏蔓菁末伏芥

立

秋有雨萬物收處暑有雨萬物丟 立秋三日不下子

早立秋涼颼颼晚立秋曬煞牛

謂立秋時刻午前爲早午後爲晚

處暑

熱不來

處暑喫高粱

主豐收

穀兒黃挂頭全憑鋤一鋤

八月初一灑一陣旱到明年五月盡 白露一半田

小麥

小黍小豆此時有成熟者

齊白露摘瓜挽小豆 白露耕宿麥 七

月十五遊花田

蕎麥開花

七月白露麥種早八月白露麥種

遲 秋分耩麥

宿麥

秋分割田 先社後秋分必定好收

成先秋分後社必定忍餓 不怕秋分不怕社只怕晝夜

相停那一夜

秋分夜多霜

過社十日無生田 秋社燕去

寒露百草枯 重陽無雨盼十三三無雨一冬乾 霜

降割葦 霜降搭橋 立冬不使牛還有三垧朝陽地

小雪羊回圈 小雪封地大雪封河 明冬暗年

冬至日晴元旦

陰無風主豐年

新冬舊年 冬至一陽生 一九二九喫飯溫

手三九四九凍破碓臼五九六九沿河看柳

又曰開門叫狗

七九

雁來八九河開

又曰七九八九沿河看柳

九九又一

九犁耬徧地走說

蠛蠓蟲名小如米色紅小兒謂之紅陽婆九九後此蟲徧地走余目驗良然壽陽地寒此時犁耬不能出地當指蟲

言又沿河看柳特言近河樹木似有煙氣耳非謂柳色至此已青也

七九河開河不開八

九雁來必定來

道光十五年二月初七日始聞雁在九九第二日

七九六十三

行人路上把衣擔

九九又一九便是春分候

九日一

場風伏日一場雨

春打六九頭

臘月三白兩樹稼莊

家出門拍大話

道光七年十二月初三日初九日冰花滿樹次年大有九年正月十六日十八日十

九日三番樹稼亦豐

臘七臘八出門凍煞

臘月半泥水滲

陽氣漸生

日光融也

冬暖時時東春寒日日消

天寒日短無風就暖

辰趕月好收麥月趕辰餓煞人

十二月二十四日五更候之

參正

割田辰正拜年

皆指旦申言夏小正八月參中則旦俗說元旦接神即接辰也吳丈彥明說

許慎說文解字農房星爲民田時者从晶辰聲晨農或省
段氏玉裁注爾雅曰天駟房也大辰房心尾也於天官爲
東方蒼龍周語曰農祥農正章曰農祥房星也農正謂立
春之日晨中於午也農事之候故曰農祥爾雅注曰龍星
明者以爲時候故曰大辰以晨解例之當云从晶从辰辰
時也辰亦聲爲民田時者正爲从辰發也農星字亦經作
辰周語辰馬農祥植鄰切鄭康成曰凡記昏明中星者
爲人君南面而聽天下視時候以授民事壽陽北謂之
正蓋卽取正南面
之義方言甚古
霜降冬至
冬離寒節一百五寒節離伏不用數冬謂冬至

過了冬長一鍼過了年長一綫 羊馬年好種田 過了

閏月年走馬就種田有嬾人無嬾地 莊家憑糞土要秋

收先餒牛 犁深土耙絨土耨淺土多糞土少田土農家五土

糞多田少 麥子種泥條黍子種乾土 麥宜稠穀宜稀

其穫必倍 又曰彭祖活八百忘不了稀穀稠麥 又 莊家種黑土
曰稀穀打下稠穀子氣得稠穀沒處死

年九得有一年不得換一斗米喫土宜 子不種麥亥不

麻丙丁種穀不生芽庚辛黍稷無子粒壬子黑豆不開花

一坐三苗苗至一毀三不得 不怕重種穀只怕穀重種

重種穀謂已種旋毀者穀 重複黑豆種子種穀一年一個

沒甚喫謂無糞下子 黑豆不識羞遮了黑突溝言犁宜淺 麥

種場黍種湯麥地宜堅 黍子頂瓦出 蕎麥見豆外甥見

舅去年種蕎麥地 黍杖種豆親如娘舅豆宜於去年黍田種之杖舊根

也 凡苗重種則 種瓜得瓜種豆得豆 蕎麥不涸晌

就拿布袋裝 麥子十五豆八顆下子每握之數 三犁蕎麥一

過黍一過一犁也又曰 麻三穀六菜子一宿老蕎惱了

翻身就出謂生之日 麥耩凌沙溝數多凌沙凍地將消者凌讀如雷

數遲蚤

溝一作勾麥穗
中小瓣謂之勾

扁沒三黑沒四小豆角角沒十四豆之顆數

南麥開花在黑夜北麥開花在白天 榆錢錢落地還

有兩垧穀地又曰打肥穀地 繭繭開花點小豆小豆開花打繭

繭繭落葉葉小豆摘角角繭繭有刺結小紅顆山坡多有之熟則紫味甘可爲麩一

作棟 穀實一百五十日黍實一百二十日蕎麥實七十

日 麥子犁深一團皆根小豆犁淺不如不點 春地耙

三徧牛蹄躑踏徧 耒中惜子主老餓死稜中惜苗主老

受貧下子宜密 天旱鋤田雨潦澆園 天旱澆山雨潦

澆川 鋤鈎上有水鋤後田潤 又匙上有火翻場禾易乾 耕三耙

四鋤五徧八米二糠再沒變 穀鋤一寸強如上糞 麥

澆小穀澆老雨 乾鋤糜黍去熱草 溼鋤豆不傷根 細雨淋淋

鋤小豆

不傷葉
易長

莊家荷起犁耙一百日喫夏莊家荷起

鋤鈎一百日喫秋

莊家作在鋤鈎買賣作在一秋 水

地蘿葡萄旱地葱旱棗潦西瓜 麥熟杏黃買賣人歇涼

穀上垛女上炕穀攤場女歇涼 穀擔槍女歇涼 好黍

不見葉好穀不見穗 杏兒塞了鼻孔騎上毛驢換穀種

穀兒挖泥秀還要太陽熬麥子鑽火秀還要根頭溼

麥子摻泥條乞兒捨了瓢

種時有雨主豐又曰麥子凍折腰乞兒擲了瓢

麥秀

五節穀秀六葉

糜子挨著手一畝要打七八斗

蕎麥

不扣根還有七日生 春雨溢了隴麥子扁豆丟了種

秋禾連夜變夏田一晌午 秋不涼子不黃 有錢難買

秋後熱

膽穰穀鍋底粥

穀打二次謂之膽穰其粒堅好

春凍脊梁秋

凍窪 有遲一月養種無遲一月收割 豆打長稽麥打

短稈麥子傷鎌養豆黃黍子傷鎌一團穰 山田少收河

地多收十年平坡一般收 養蠶種地當年福 種在地

收在天 家有五口一具牛兒緊走 陰雨長工歇牧羊

兒受阨 莊家生得陷越貴越不糶 莊家完了糧便是

自在王 地是刮金板年年有出產 八月牀上無繡女

有米喫到五月有炭燒到臘月 春種一斗子秋收萬

石糧 甲日下雨甲日晴甲日不晴十日泥 久旱逢庚

變雨澇遇甲晴 壬子癸丑破水從山頭過道光十五年六月二十五

日癸丑破前夕大雨 壬子癸丑水連天甲寅乙卯響榔乾 蝦蟇

叫水甕津如不信挽艾根艾根有小白 海現三日下大

彈皆主雨

雨 雲南鈎風雲北鈎雨 天上鈎鈎雲地下水圪洞

東虹忽雷西虹雨南虹下大雨北虹賣兒女 淋了土王

頭一十八日不使牛 淋了土王一日一場 淋了伏頭

單日旱雙日雨 天旱雨澆山雨澆水澆川 早燒陰晚

燒晴 春甲子風夏甲子旱秋甲子連陰冬甲子濫雨

三日東風不由天主雨 單珥風雙珥陰日旁氣 一霧十日

晴 蚤看東南晚看西北有雲主雨 辛多麥不收正月上旬得辛遲

春旱不算旱秋旱去一半六月連陰喫飽飯 金斗糧

長水斗雨火斗旱土木斗人瘁每月半驗 榆錢飽時候好

一年槐子二年麥道光五年槐花子繁次年麥收又曰槐花子稠明年麥收 雨前毛

雨不雨雨後毛雨不晴 晚雨下到明早雨一日晴 天

旱東風不雨涼西風不晴 八十老兒沒有見東雷雨

月牙兒仰米糧長月牙兒卧米糧落又曰月牙兒栽
米糧衰上弦

土霧三日下大雨 要看騎月雨單看二十五前月二十
五日雨次

月十五日 東風刮到西金尅
木 西風連夜吼巳午時少息
又曰西風不

過西東風連夜吼此言驗 火日多風雨 戊己不同天 伏日東風

不下雨謂之早
東風 八月十五雲遮月正月十五雪打鏡主
豐

今年冬不冷明年夏不熱主
歉 流錐長小豆黃簷溜冰
飭謂之

流錐道光六年三月二十
七日檐冰尺餘是年小豆收 雲朝西雨點賽簸箕雲朝

東忽雷礮響一場風 月煖火月外紅雲如
火狀主雨 兩頭小必

定好兩頭大必定怕謂正十二月
大小盡也 連頭忽雷多雨雹夏
正

午暴雲雷聲不絕主
雹有西北風時居多 五月裏迷霧行船不用問路主
潦

黑豬過河夏雲主雨 閏月年不栽樹閏月年不作醬 窗間

窟三石二斗穀風力重 熱極生風寒極生雨 忽雷雨連

三場 東風潮雲西風下雨夏 伏裏三朝二雨 三日

不下燄一塲 早雨一日晴 雲相交雨相飄 雪油地

滿收成雪消如油

占驗

日赤無光謂之水泛主遠郡有水灾多在午後 月赤亦然 天

鼓鳴主豐 霜葉紅謂之山兆紅主明年豐 穀成時穗

上多穀牛牛蟲名主豐 月暈圓主陰缺主風 雲壓山謂

之山戴帽主雨積雪遍地不能消謂之蓋被牧羊者最怕

此 西虹主菜不收 黑豆葉翻主雨 天倉開主豐天倉

星名

春東風雨夏西風雨東風晴謂之旱東風秋西北風

霜冬東風雪

寸草飽主豐

田間小草長不過寸故名俗謂年荒寸草不收卽指此也

蚤多收黍蠅多收蕎麥

象形

五月一日雨主生五花蟲

端午雨亦然

卽好蚌蟲有白項鴉來蟲卽滅

雲夕淹日主雨

晚燒忽止

伏

丙東風謂之旱風不雨生蟲西南風謂之金風多雨

山

鵲噪樹梢主風

無雨而霧謂之旱霧主傷苗花

日黃

主風紅主雨

螿出埵主雨又或成羣不計其數一道往

來謂之螿傳道亦主雨

犬齧草主雨

立夏後幾日布

穀鳴秋成幾分卽如其數一旬外另數

十月一日晴人

多病陰主冬寒

臘八前夕以冰置糞堆燒之明年稼不

生蟲

臘八日以盥水置中霽視冰凸何方主何方豐中

央主本地豐

方言

犁溝謂之塙兩犁之間謂之隴 高地謂之塙下地謂之
窪寬者謂之坪狹者謂之堰凸者謂之圪塔凹者謂之圪
洞水聚處亦曰圪洞 土塊謂之克拉 春凍釋謂之澤
起秋漲消謂之落澤 砌石瀉水謂之水簸箕 巷謂之
合朗 棒謂之不浪 物傾斜謂之走作又謂之克流

疾雷謂之忽雷

小雨謂之忽星

星讀如西

又謂之薄瑟

虹

謂之絳

元微之有山頭虹似巾之句

雹謂之冷雨

冰謂之冬凌

暖謂之暖和寒謂之涼騷

薄寒中人謂之迫

檐冰謂

之流錐

薄陰謂之麻陰

昨日謂之夜來明日謂之早

晨 午謂之晌 午晚謂之後晌 暮 午睡謂之歇 晌夜眠謂

之歇 早禾謂之種 伴行謂之相跟 相入聲老學菴筆記世多言樂天用

相字多從俗語作思必切如爲問長安月如何不相離是也然北人大抵以相字作入聲至今猶然不獨樂天老杜云恰是春風相欺得夜來吹折數枝花亦從俗聲乃不失律 喚人謂之瞧 寄語謂

之導 取謂之荷去謂之召 思念謂之結計 閒談謂之

道刺 美謂之克器 醜謂之慙甚 無謂之沒拉 析產

謂之另同居謂之夥 田家禁約謂之夥狀 秋成守望

謂之看畔 受雇耕田者謂之長工 計日傭者謂之短工

租田種者謂之莊家 又謂之伴種 鬻女工所需物者謂

之貨郎子 歲尾嫁娶謂之戀歲 屋謂之家 棉花謂

之花 硯謂之硯瓦 婦人蒙面謂之眼紗 田鼠謂之

各犁

行疾而溜

其大者謂之黑老

出穴則目無見

鵲謂之涅鵲山鵲

謂之灰老婆

蜻蜓謂之河嬉

蟬謂之秋涼蟲

蟋蟀

謂之買油老

鶯謂之黃婁

即黃栗留

蠹魚謂之不瘦米蟲

亦曰不瘦

水面小蟲謂之水蝨

蛤謂之海螺簞箕

鳩謂之種穀蟲四槃八寶鳩自呼也

暑兒夏蟲也

色黑大如

黑豆飛能眯目

寒兒秋蟲也

又名毛蟲多在禾穗中

或曰暑往寒來一蟲名

也似蜂而小飛有定處經久乃移

柿自輒曰酖

本草酖柿注調菹也

奠瓜謂之

乃瓜瓜蔓漸長以土壓之謂之壓瓜

夏小正乃瓜一本作乃衣瓜疑即壓瓜也

乃瓜之名甚古

凡秋收麥曰挽油麥曰割小豆曰挽黑豆曰撲

麩黍曰割亦曰挽亦曰攬

取其穗

蕎麥曰挽穀曰割高粱曰

斫瓜曰摘菜曰起蒜曰起葱曰挽豆角曰摘

凡登場

取穗麥曰扣油麥曰扣黑豆曰扣糜黍曰扣亦曰攬穀曰

切高粱曰牽 藕謂之藕根 說文艸部董鼎董也杜林曰藕根備鱗段玉裁注郭璞曰

疑根字為贅以郭說證之則藕根即荷根殆猶北方之古

也語

五穀病

捉不住苗 傷溼種不出土 忽闌 苗不 偏稜 稜不平故

有苗一稜無苗 涸傷 初種大雨淤泥地 隔別 種傷雨

茹薄 種時不得深淺之法或子溼則 格都 苗出土傷

不舒 麻 苗稠而間遲見雨 火籠 似火焦 灰竄 小豆

油汗 似豆苗早甚 竄瓣 穀穗半 捏栽 已鋤之草 白儻

死穀早 霉 種溼則穗出白泡中 立僵 成而稿色白 豎

穀禾秀未脫穗不下屈蓋地氣怪穀禾未出穗此穀已熟相傳有烏銜

去先報田神云老穀穗無實而毛似貂尾莠俗名莠鬼秫秫

高粱結實不牢觸之則落糜活子黍糜結實不牢者黃蘆心穀之無穗者

糧價物價

糧價視歲之豐歉其貴賤亦有制以斗計之壽陽二十米

貴至一千二三百錢賤至四百上下麥貴至一千一二百

錢賤至五百以上嘉慶四五年麥賤至四百以上黃米黍

去穀者貴至一千一二百錢賤至五百上下粃子蕎麥去皮者貴

至一千以上賤至四百上下乾隆二十四年賤至一百以

上高粱貴至八百以上賤至二百五六小豆貴至一千

一二百錢賤至四百上下小豆價黑豆貴至八百以上賤

至五百上下或至二百上下

黑豆價視高粱

穀以米六分作價黍

以黃米六分作價蕎麥以粃子六分作價扁豆貴至九百

以上賤至四百以上油麥貴至七百上下賤至二百以上

糜子價視穀

咸豐四年壽陽穀每斗一百六十錢米三百

百小豆二百二十黑豆一百二十黍子二百四十黃米四

百高粱一百六十油麥二百六十麥子四百八十粃子四

百二十蕎麥一百八十白麵每斤二十四五錢蕎麥二十

油麥麵十六豆麵十四聞之里中

父老僉云自來價賤無過此年者

日用諸物多取資於他邑其價與時消長油出神池利民

等處每斤錢一百上下賤至七十以上酒出榆次朔州等

處本邑亦有之

皆高粱燒酒也黍酒本邑自釀

每斤與油價相若賤至五

十以上鹽上者出歸化城每斤三十上下賤至二十以上

次者出應州徐溝等處每斤二十上下

邑納鹽課不食官鹽長蘆官鹽每斤

三十上下此私銷也醬上者出太原省城每斤五十上下次者出歸

化城每斤四十上下嫌出陝西神木等處每斤三十上下

鐵器出潞安孟縣等處田間鐵器半出本邑半出他邑木

器亦然其價以物為斷棉花出直隸欒城趙州等處每斤

自一百四五十至四百上下每斤有定價一百二十錢價貴則斤數減價賤則斤數增

平斤而外有不足一斤者謂之小斤有一斤多者謂之老號布出直隸獲鹿欒城等處

者謂之東布每尺木尺加二寸此大尺也三十上下至四

十上下出本邑者農人所需較東布為多餘布鬻於北路

每尺亦大錢二十上下咸豐四年壽陽棉花每斤一百二十錢

青鹽十八廉二十醬四十上下價亦極賤

歲之豐歉由於天糧價之低昂亦由於天然有不盡由於

天者豐歲糧賤非減價不能糶歉歲糧貴非增價不能糶此由於天也若值不豐不歉之歲較之豐年未得其半比之歉歲尙云薄收而糧價驟長視大歉而更甚此豈盡由於天乎卽如道光十四年壽邑秋收有四五分者有二三分者參差不等而八月初間禾黍尙未登場糧價旦夕昂貴雖以後之收成已可逆觀而以前之蓄積尙有贏餘何市集之米一時遽空良由逐利之徒坐擁厚貲壟斷左右一見禾米空秕度後日之收穫子虛遂爾囤積居奇致一時之市價騰踴是歲事之歉猶未可知而人事之歉已難救止此風一倡狡獪煽騰借如粟米一囤朝一商以錢八百買之夕一商以九百買之明日一商復以一千買之輒

轉迭買愈增愈貴而莫知所終極而貧民之乏食者雖糶升斗而不予以故民間雖有積蓄之家亦靳而不糶一則待價之增長一則慮後之無資諺云莊家生得甯越貴越不糶此之謂也更有甚者買者不必出錢賣者不必有米謂之空歛因現在之米價定將來之貴賤任意增長此所謂買空賣空虛擡高價而使價終不能平也或謂粟米貴賤自有一定之數然或貴或賤聽牙行視糧之多寡以增減何市集之價尙平而商賈已暗增數倍是歲之歉與不歉盡操於斯人之手也而何得謂有一定之數乎壽邑以農爲重上戶田多者積蓄有餘憑糶糧以爲日用之資卽中戶稍有贏餘或三斗或二斗亦憑出糶爲水火之用而

鄰境之不足者如榆次平定諸地兼可搬運待食非若他境之土狹人稠不足償其用也是不必有商買囤積而自充足有餘也或曰如朔州歸化城俱有糧店粟積如山何不可爲之不知彼處爲粟米聚會之所五方輻輳之地糶者必由此入糶者必由此出不論歲之豐歉此其常事苟非商買囤積粟米焉能流通此又以地言之而非可同日語也或又謂二處之米粟亦極昂貴何故夫二處地廣糧多今歲雖云薄收較之他境尙屬豐盈穀米卽云稍長何至昂貴不止皆因關南商賈日夜奔走叢集其地厚貲囤積以致米粟價高不能四達此又奸商逐利使遠近之價不能平也夫古人權三十年之通雖有水旱民無菜色今

買人儘力囤積以爲奇貨是歲本不歉一轉盼間而卽成大荒大歉矣又邑之棉花買自欒城統計一邑每年不過用數千駝今歲雖云薄收而舊日之積蓄尙有數千駝亦足資一年之用而富商六七八人故以高價盡數買積以專其利每駝非六七千不售夫有六七八人之專利致使一邑停機住紡衣著無物是億萬人之號寒盡操於六七八人之手也可勝嘆哉今穀米諸物訪諸四境本屬薄收價之昂貴勢所必至然亦漸增漸長因其自然何至瞬息之間騰貴無涯此荒之由於人致而不盡由於天所當急爲區處者也爲今之計宜於各處市集飭禁稽查其從前囤積者令其平價出糶祇許小販往來搬移大賈毋得

再積各鄉耆老公公平廉慎之士互加訪察如有不遵嚴禁者稟官究治其牙行有徇隱射利者嚴加懲辦其胥役騷擾土棍訛詐者罪之如此實力稽核遠近畫一奉行則糧廣而價自平價平而糧益廣人致之荒可泯而天致之荒

亦可少彌矣

族兄歲貢生候選訓導朝駿說

夫造物之所以無盡藏者恃化育之流行而已育自無而之有化自有而之無自苗而秀而實育也自收而藏而食化也不有育也將何以化化之有滯育斯窮矣古之聖人有無懋遷農末相資所謂盡物之性亦贊化育之一端也今舉天地所育壅閉之使不得化枵腹者啼飢深藏者速腐吾知非天地之心也近者道光二三年至十年十一年

屢遭荒歉斗米價錢三百文增至錢八九百文各市鎮倉
筭多者萬餘石少亦幾千石十二年歲大歉斗米錢千二
三百文閭閻大困人情洶洶此育而不化之明驗也是年
冬市無赤米困麓空虛十三四年歲始稍豐此化而後育
之明驗也愚民無知見利不見害自怙充餘垂涎末富豈
知生機一塞百弊滋萌蠹人心害風俗干刑憲長亂源領
本開商者視財東爲孤注得隴望蜀者寄素產於賭場歲
歉則恃獲利而驕淫其心年豐則憂賠折而斲喪其命爲
富人者反爭勸爲此此何心耶然則如之何而可道光十
二年各處大荒囤糧指價貧民握錢無處易米晉省介休
太谷忻州有紳士富戶某某各糾其村中富人出貲依市

價糴米儲於社派清慎者司之減價糴給各護其村中之窮民所出錢本不足更捐之至來春米價略平乃止此本社倉捐賑之法有共見之利而無不見之害誠盛德事也是在爲富人者處善循理損己以益人實人己之兼益禮義之生自富足始庶幾太和醞釀風雨調諧遐邇貧富得相安於無事不亦休哉

西峒村解
孝廉崙說

水利

壽陽向無水利惟南鄉韓村南有小河俗名白馬河其源發於和順平定樂平諸處自邑之羊頭厓鎮南向西流至鎮西名關頭河會泉水小河乃大又至冷泉寺西與壽水合又至盧家莊南與渦水合渦水甚微自渦山出北流與

小河合至段廷村東歡喜嶺北水勢漸盛地亦漸闢有田
十數頃乃河南村段廷村韓村三村之地開渠灌溉實始
於乾隆二十五年也先是韓村段廷村北東村之間有田
十數頃雍正元年韓村開渠自建公村西段廷村東葫蘆
厓底接水灌田二年而渠壞乾隆五十八年韓村貢生鄭
景僑與村人復開此渠未成而景僑卒至嘉慶二十二年
其子生員天與又與村人議自段廷村東隨河接水渠路
有占段廷村地者畝出租千五百錢其渠遂成又小河之
南韓村河南村南東村三村之地灌田數頃其渠則道光
十四年始開者也又北東村西落鎮南東村亦有水田十
數頃乃自韓村西接水灌注者邑之水利盡於是矣

韓村
鄭孝

廉天
寵說

平定州志云通志壽陽民田多山坡旱地不能設渠舊志
壽水在縣南二里許盛夏山水暴漲河流上下皆赤惟壽
水獨清開渠溉田可爲民利

畜牧

宋陳旉農書牛說云四時有溫涼寒暑之異必順時調適
之春初必盡去牢欄中積滯蓐糞亦不必春也但旬日一
除免穢氣蒸鬱以成疫癘且浸漬蹄甲易以生病方舊草
朽腐新草未生之初取潔淨橐草細剉之和以麥麩穀糠
或豆使之微溼槽盛而飽飼之豆仍破之可也橐草須以
時暴乾天氣凝凜卽處之煖之地煮糜粥以啖之卽壯

盛矣亦宜預收豆楮之葉與黃落之桑春碎而儲積之天寒卽以米泔和剉草糠麩以飼之春夏草茂放牧必恣其飽每放必先飲水然後與草則不腹脹又刈新芻雜舊橐剉細和勻夜餵之至五更初乘日未出天氣涼而用之卽力倍於常日高熱喘便令休息勿竭其力當盛寒之時宜待日出晏溫乃可用至晚天陰氣寒卽早息之大熱之時須夙餵令飽健至臨用不可極飽飽卽役力傷損也牛之病不一或病草脹或食雜蟲以致其毒或爲結脹以閉其便溺冷熱之異須識其端其用藥與人相似也

壽邑飼牛忌麩糠與

此小異

養犢最爲農家之利或畜牝或買犢一年之間可致倍獲

犍牛其利尤多詩曰誰謂爾無牛九十其惇蓋牧養得宜故字育蕃息也但不可售於屠肆牛之勤苦其功甚大羸老則輕其役而養之可耳律有屠牛之禁語曰戒食牛肉者不染瘟疫理當然也

邑志云產牛特高大以耕作負重勝於常產四方爭販易焉

吾邑趙漢章先生宗文蒔竹編云牛宜圈於廐中餒草之後冬則繫於露天夏則繫於樹陰俱在屋之前後以便看管其所卧之處用黃土鋪墊積久成糞陰雨仍放欄中不必牽出也豕不可放於街衢亦不可常在牢中宜於近牢之地掘地爲坎令其自能上下或由牢而入坎或由坎而

入牢豕本水畜喜溼而惡燥坎內常潑水添土久之自成糞也

致富奇書云羊性惡溼棚棧宜高燥常埽除糞穢巳時放之未時收之春夏早放秋冬晚放食熟物則腹脹不能轉草雞栖宜據地爲籠籠內著棧可免狐狸之害生雞初到家便以淨溫水洗其足放之自然不走壽邑羊春則出山牧之於遼州諸山中秋則還家牧之於近地禾稼既登牧之於空田夜圈羊於田中謂之圈糞可以肥田雞亦有散放者不盡籠飼也

備荒

區田劓地爲區布種而灌溉之可備旱荒櫃田築土如櫃

種藝其中以時疏洩可備水荒行之山國則櫃田尙可區
田非宜以無水可灌溉耳至於蝗災吾邑罕見惟好舛傷
稼乃旱蟲也農人言此蟲遇白項鴉羣飛則滅秉畀炎火
可以治蝗不能除好舛也水旱蟲災皆難備禦則蓄積之
法不可不講北方高燥無霉變之虞粟可支久耕三餘一
耕九餘三謹其蓋蔽毋縱商販囤積一遇歉歲富民或施
貸或平糶不待蠲賑而民無死徙救荒之策無善於此必
不得已則所謂救荒本草野菜博錄康濟錄諸書皆可參
試至王氏農書附載辟穀數方則又不得已之下策矣
道光十一年壽陽大旱子弟宿藻與村人議周急之策其
略曰今歲旱荒秋成歉薄不敵去歲之半數百里內米價

騰踊閏九月間邑侯鍾公

汪杰

令於城關市鎮各處號囑

禁米平價出糶救時卹災誠善政也但村舍無糧去市較遠寒餓之人負米往來數十里頗覺費力且有孤貧婦女老病幼弱之人升合所需早晚零買既不能遠赴城市又不能多辦錢鈔告糶無門取攜不便晨餐夕飯幾於斷炊此合社所共知同人難坐視者也茲於十二月十五日鳴鐘齊集北寺村人公議量力捐貲得錢若干存社買米隨時隨價公入公出現錢買米不短不賒錢米輪轉運濟周流迨至明歲秋收糧米充足販糶有人給用不乏復將錢本各歸原人再者量米之時議有定數多不許過一升少則合勺聽便祇給貧戶不時之需難供大眾無窮之用至

於力辦斗粟人家自宜仍赴城市糴買村社錢少米缺勢難支應公議至平事出情願如有隱蔽偷減攘奪之事不遵約束輕則合社議罰重則稟官究治凡我村人各宜安貧守儉自食其力無慢無私以期感召豐亨也

祠祀

陸清獻公靈壽志論云龍王者何其地祇之主龍者歟抑古參龍御龍之類歟古者祈雨天神則有風伯雨師地祇則有名山大川隋唐間祈雨初祈嶽鎮海濱及諸山川能興雲雨者七日乃祈社稷及古來百辟卿士有益於民者又七日乃祈宗廟及古帝王有神祠者又七日乃修雩祈神州宋興始有五龍廟及九龍堂之祈蓋龍神之祀於古

無聞有之自宋始也至廟貌冕服擬於王者特世俗從二氏之說耳

孟縣王石和先生珣集云介之仙臺有所謂蚺蚘廟余偶經其地有紳士語曰此田子方廟也徧索碑記無復言子方事惟門額有三賢字其字跡斷落僅可尋汾乘載子方與卜子夏段干木號三賢想昔之好義者建祠於茲後人不覈徒以子方與蚺蚘音相合而又冠以田遂置子夏干木不道而子方之名獨以訛顯今廟象尙三其加冕而旒則後人附會而新之也

趙漢章先生羊舌大夫廟考云壽邑舊有羊舌大夫廟前明一統志云在縣治東祀晉大夫羊舌氏今一統志云在

縣治西南四十餘步今廢康熙十一年沐陽吳公修邑乘
藍本於明季神宗時所輯志書而今一統志仍其說明一
統志天順五年所撰又在神宗前百餘年而一以爲治西
一以爲治東以今觀之似明志爲較優也邑治東南十五
里有龍化山俗呼爲樹兒嶺山之巔有小廟一楹其神像
赤面長鬚烏帽角帶以夫人配享而無碑誌可考詢之士
人曰羊頭神也姓李名果有人盜羊而遺其頭不敢不受
受而埋之後盜羊事發詞連李氏掘羊頭而示之以明已
不食識其舌舌存得免號曰羊舌左傳孔氏正義亦引此
說以爲杜註不從聊記異聞噫山毗村叟目不識丁而口
傳耳熟越二千餘年而猶嘖嘖道其事儻所謂禮失而求

諸野者歟又考新唐書世系表晉武公子伯僑生文文生
突羊舌大夫也又云晉之公族食邑於羊舌突生職職五
子赤肸鮒虎季夙爲羊舌四族也正義之說如彼唐書之
說如此羊舌之所以得姓受氏者俱不可得而深考然斯
廟之爲羊舌大夫則灼然可信矣按晉獻公使太子申生
伐東山臯落氏狐突御戎羊舌大夫爲尉狐突欲行羊舌
大夫曰不可違命不孝棄事不忠雖知其寒惡不可取子
其死之處人父子之間而能以忠孝相勗卒使申生得成
其爲共微大夫之力不及此况祁僕對平公之言曰羊舌
大夫其幼也恭而遜恥而不使其過宿也其爲侯大夫悉
善而謙其端也其爲公車尉信而好直其功也其爲和容

溫良而好禮博聞而時出其志也羊舌大夫之行如此其亦可稱立功立言之不朽者矣皋落在今樂平之東境而平定州有申生廟狐突廟壽之西境五十里亦有狐突墓大約東山一役經過斯土後之人遂尸祝而俎豆之耳突子職以聰敏肅給輔中軍尉祁傒悼公十五年而卒平公立祁傒請老職子赤輔中軍尉祁午食邑於銅鞮故曰銅鞮伯華銅鞮故城在今沁州城東南赤弟肸卽叔向習於春秋爲平公傅仲尼偁爲遺直食邑於楊氏今平陽洪洞縣南二里有古楊城叔向所築晉頃公十二年魯昭公之二十八年也晉殺祁盈及楊食我遂滅祁氏羊舌氏祁傒免叔向於獄而分祁氏之田以爲七縣分羊舌氏之田以

爲三縣據杜註銅鞮平陽楊氏三縣爲羊舌所食之邑伯華叔向之墓在今沁州城東南而今之壽陽爲韓固所治之馬首廟卽在馬首東十餘里則壽陽雖非其食采之地而亦其過化之區廟祀千秋有由然矣

七義祠趙武韓厥程嬰公孫杵臼益以鉏麇提彌明靈輒凡七人孟縣藏山相傳爲程嬰藏孤之地故孟壽間多祀之或曰八義兼謂程嬰取他人嬰兒以代趙孤者也

老趙神禱子者祀之不知何神疑卽程嬰也嬰存趙孤其功獨鉅宜享專祠後遂沿存孤之事以祈廣嗣今神像羶笠短衣囊兒負肩仍似倉皇避難狀其囊兒蓋卽趙武也以嬰爲趙氏老故傳老趙俗云昔有農人趙老多子歿而

祀之誣矣

民間五祀曰天地曰土神曰門神曰竈神曰司牧又有家堂神謂之合家歡樂其圖具翁媪兒孫諸像

俗名小兒爺爺

皆祀之

邑有風神山祀孤突不知何據

織事

織事曰擇花

土人呼棉花爲花

曰彈花曰搓花

搓爲細卷

曰紡花曰纏

線曰拐線曰漿線曰絡線曰鈎線曰引布

梳線也

曰安機曰

卸布曰錘布曰漿布曰裁縫

布一匹舊長三丈六尺今長三丈四尺健婦一歲得布五十匹一布餘錢可得百五十計五十匹得七千五百餘錢

得五十二三丈餘布

縣志云藍尙質陝西膚施縣人由選貢萬曆十九年知壽陽縣政尙勤儉躬行化民邑素不諳紡織至是始教之民賴其利祀名宦祠相傳初教時縣令爲製紡織具雇織婦分四鄉教之月察歲考獎勸備至至今父老能譚其事然多不知藍公名者固宜表而出之尸而祝之也

邑不飼蠶不種稻地氣晚寒或非所宜然唐魏風凡三言桑汾沮洳詩鄭箋直以采桑爲視蠶事鴟羽之三章曰不能藝稻梁其所藝固不僅黍稷也今太原迤南郡縣多稻且有蠶織者邑之南鄉近亦有水田可種稻志載物產有桑有絲絹由來已久乾隆中余家從伯父樹桓妻張氏嘗

飼蠶手織繭紬數十年來此風寂然十畝之外閑閑泄泄
豈盡關地氣耶

雜說

壽陽風俗之厚莫如喪禮民間三年之喪皆以三十六月
爲斷謂之三周年墓祭一歲凡五日元旦清明七月十五
十月初一冬至新葬親者三年內清明七月十五十月初
一皆前一日埽墓謂之上新墳

徐氏乾學讀禮通考云案唐人王元感嘗勅三十六月之
論爲張公柬之所闕已無餘蘊矣乃沈堯中復爲此說

韋人

鳳引橋李
沈氏說

豈未睹張公之文耶必以三年爲三十六月將
禮文所云期之喪二年句又何以解之萬斯同曰予鄉四

明之俗禫除之後仍以素服終三十六月歷禨相沿莫以爲誤既非古典又違時制乃不知禮者竟以爲古禮當然而不敢變其知禮者又以爲親喪宜厚而不敢議此實非禮之禮君子不以爲可也

禮言倍期蓋荀子之說其義甚精與公羊傳漸三年之義互相發明所謂三年之喪二十五月而畢也後世折衷定禮以二十七月爲斷自是不易之制壽邑民間喪禮雖未合立中制節之宜而唐魏遺風至今弗改余嘗著三年之喪說二篇推闡仁人孝子哀痛未盡思慕未忘不容已之心亦以見吾鄉喪服風俗相沿亦必有本也

吾邑劉鶴園孝廉霽戒淹喪文云肇自委壑衣薪之後爰

有遷庭祖廟之文立主所以棲神送死乃當大事往而不
返命稟於天遺之以安死必歸土外姻屆期於踰月改葬
降服而成緦東山落淚於雨崩西伯傷心於水齧上世雖
不封不樹中古則若斧若堂此掩骼埋胔禮經謹時月之
令而停喪掩柩國法嚴律例之條也乃有晚近不守前型
旣魄降而魂升仍家居而室處暫盡帷堂之奠杳無執紼
之期習以爲常恬不知怪豈古今之異尙乎抑習俗之移
人歟不揣固陋請畢其說謂屬纊未久遷於中野心所未
忍夫子之於親已幽明之異路則葬之與養亦服事之同
情禮重修虞精氣將依而不渙事如暴骨施棊亦殆而不
安陰陽之錯處堪憂笑語之音容罔據其不忍別者姑託

仁孝之名其習而忘也誰抱哀傷之意子弱冠而不娶何
以爲情喪屢歲而未行乃若是悫古稱凡附於棺者必誠
而必信今以之死而生者不知而不仁此其未解一也謂
亡者有知家人父子應有流連不舍者豈知安樂之時喜
於聚首愁苦之會足以灰心隔膚髮於兒孫渺瞻依於霄
壤以所不忍見聞者而使之聞見以所無可言語者而聽
其語言寂寞一堂咫尺千里撫膺莫訴顛天無從况婦姑
谿勃之聲言言詬誶兒童謔浪之習句句詼諧叱狗尙避
乎客之尊反脣乃忘乎親之近鏡前饒舌詎免無能斯倍
之情泉下吞聲彌增相逼難堪之恨此其未解二也謂官
室之居委於草莽未免有情顧神明原體貌於椁楹而形

骸難昭著於耳目魂兮歸來葬者藏也夜臺枕北牖之陰
壽域鞏南山之固固並行而不悖實理勢之兼通矣否則
罅隙不堅難免賊風之竊入燠寒相繼莫禁戾氣之頻烝
紛紛弔客之臨蟻隊緣棺而上寂寂靈帷之奉蠅沙就席
而鋪鷄犬扇拂其塵灰鳥雀塗汙其粉堊材葦蒙戎而並
積器皿雜沓以偕陳爨竈相鄰煙氛薰炙溷圉難去臭味
差池夫埋玉於岩下寒松土脈之涵濡無盡羈身於門前
矮屋物理之枯槁難言子息受困於風霾高堂竭蹶而恐
後父母久僵於天日同室淡漠而無關此其未解三也謂
朝饗夕飧便於供奉故姑徐徐爾抑知滫瀡是養所貴色
笑之親跪奠有時莫重新鮮之薦魚鮓尙千里之可通馬

鬣豈一朝而難至果其孝誠不減聞雷莫阻泣墓之悲祇恐洸潰時形當食而有憂羹之慮委其事於子婦每境過而情遷役其志於貧饜且後親而先已春禴秋嘗禮祇宜不疏不數菜羹蔬食誰復能必祭必齊勉彊於一飯之投遲延於三日之出不愁鼠瘦且喜猫肥褻棄鬼神之餘幾等噉蹴之與此其未解四也謂豫凶非禮渴葬未安以待異日此尤不思之甚矣喪事有進無退人情慮患於先陵谷之變遷無常禍患之紛來難料鄰人失火孝子覆靈柩以長號山水揚波大守扶柳車而幾墜此固萬死於終天猶是百有之一事若夫蟬蛻之寄菌槿之華朝不及夕晉臣莫解其言偷生也有涯莊叟難禁其怛化黃梁未熟方

爭逐乎利鎖名韁元髮易緇俄驚逝於電光石火空負瀧
阡之卜先遊蒿里之魂當年玉立成叢憚一勞於大隧邇
日雁行失次隔再世於同羣彼松柏之古墟痛未植於成
塋之手卽衰麻之虛事毫不及於謝世之身不得已而子
代父勞弟任兄事兼經姪輩並累宗枋苦次其空幾疑無
兒而絕嗣孤哀何在且等別繼而承祧親不能葬生我何
爲念及於是有不痛心者乎卽曰卜兆以居擇吉而窆固
有其理勿泥其文惟養心田乃成福地循環六氣何一歲
皆不利於時辰制化五行豈屢年盡有妨於山向徒希鬱
鬱佳城苦難覓滕公之室遍閱茫茫大地果孰符郭氏之
經借先人之遺體妄圖富貴於牛眠執後進之癡情坐失

光陰於駒過弗慎厥始雖悔可追此其未解五也謂傷哉
貧也無以爲禮徐俟豐裕庶其可焉夫盡朝夕慕哭泣皆
是真情斂手足形聖賢不苛厚禮桐棺三寸奚羨乎富室
奢風麥飯一盂孰笑其貧兒乞相而乃貪厚實以營生慕
豪華而媚俗節哀有日侈望無期究之枯魚銜索幾時分
潤西江窮鳥依人何處宏開東閣日作餽口之謀無從置
嬰時短周身之策何事懸碑偕庇護於數椽寒涼侵於屋
漏伴蕭條於四壁侍衛渺於芻靈甚而作客他鄉服賈異
地託比鄰之照拂究隔膜而迂疏密網蛛羅飛燐火起霜
寒露冷長嗟旅櫬無歸蓬斷草枯竟屬僧房永寄實罪莫
追虛願難酬此其未解六也謂親壽不齊將以待其同穴

雖合葬之說質之古而可通而露處之文考之經而鮮據
椿林拔後未亡人興祭竈之悲萱草萎時勉加餐有悼亡
之句置之於目見耳聞之近愈感其形單影隻之傷排遣
有人強顏歡笑觸緒添恨嗚咽誰知易地皆然愁嘆既非
長年之術虛位以待形跡難免祝死之疑抑思二人而卽
厭其煩各尋方便之路百子而不窮於愛孰如鞠育之心
任日月之如馳毫心目之不慘職偶偏於覆載幸不至於
偕亡費必較其錙銖乃共艱於再舉此其未解七也謂舍
舊圖新非之者多何其悖哉時勢所在宜審於一心聖善
有懷豈委於旁貸生非空桑是出何至人云亦云事異築
室與謀乃言君可則可各盡其道莫望痛癢之相關無媿

於心惟思恩勤之自補如曰破格以行眾口必起囂囂之
謗試思垂涕而道何人與共蓼蓼之哀致使逝水增波覆
車接軫故鬼新鬼大年小年纍纍排牙門填覆屍之港陳
陳櫛比庭成亂瘞之墳有時女嫁兒婚空房應怯於小膽
豈乏賓迎客賀幽宅且迫於長筵將鬼神之遠謂何抑吉
祥之事安在竟從同而不變乃執一而偏牢此其未解八
也更有絃歌之彥翰墨之儒旣選庠序之英宜重轉移之
任何乃隨風而靡舍己以從不協義之所安唯求物之無
忤婦孺口實反爲鐵案之遵典則心傳莫望棘人之見不
能俗歸於雅適使士變爲民總帳高懸難議康王之釋冕
而反漆鐙空焰誰知叔向之受弔爲重大祥旣與之琴久

離苦塊卒哭不知其日安事詩書無以歸厚而善其終豈其失禮而求諸野何氓庶之癡迷難醒而衣冠之惑溺轉深此其未解九也願假楮筆廣播士林庶箴箴規咸知改革至於出言之俚鄙聒耳之絮煩固所不計也

唐風綢繆束薪傳云男女待禮而成若薪芻待人事而後束也今里中娶婦之夕束草燎於門首殆猶古風乃知詩雖託興事亦紀實束薪之風既存俟著之俗宜革有志復古者純帛無過五兩御輪必期三周儉而中禮亦易行也蒔竹編云本富爲上末富次之此古人不易之論也本富謂以務農致富最能久長末富謂商賈興家雖不能如務農之久遠然本分求財並無傷天理壞良心之事亦尙可

永至於不義之富非道之財轉瞬煙雲化爲烏有不知律
有一定利息以三分爲準若違禁而取法所不宥且豪富

適所以致怨而刻薄必不能久享亦何益哉

吾邑宗艾鎮趙氏世以農

爲業自明迄今弗替此本富也諺云莊家錢用不完買賣錢三十年衙門錢當日還

又云賭博犯法人所皆知然今之人無不習於賭者以甚
盛之家業而轉瞬化爲烏有以可教之子弟而不久流爲
乞丐傾家蕩產辱祖玷宗皆由於賭君子懷刑豈可自罹
法網而不知自悔也父戒其子兄勉其弟各務正業卽不
能光顯門戶亦勿流於小人之歸

訓俗編云古之學者耕且養三年而通一藝非特爲饗飧
之謀亦使以知稼穡之艱難也子弟讀者不耕猶曰吾有

所事也乃有既不讀書又無他業而又不從事於耕耨第
令鮮衣美食安享榮華不數年間家道零落教不先而率
不謹雖悔何及宜使之服力田間習爲勞苦知粒米之可
貴自不敢用度之過奢守身克家莫急於此

蒔竹訓俗二
編皆吾邑趙

漢章先
生著

鄉間市易之區曰集間數日一集趁虛者謂之趕集按洪
氏隆興職方乘云嶺南村落有市謂之虛以其不常會多
虛日也西蜀曰瘞言如瘞疾間而後作江南惡以疾稱因
止曰亥徐筠水志云荆吳俗以寅申巳亥日集於市

時憲書幾龍治水俗云龍少雨多龍多雨少殊不盡然道
光十四年二龍治水時雨調勻十五年八龍治水夏旱秋

遼漁洋山人居易錄引王定國甲申雜記云崇甯四年乙酉凡十一龍治水自春夏迄秋皆大雨水溢

四庫全書目錄農家類十部後魏賈思勰齊民要術十卷
宋陳旉農書三卷附蠶書一卷元至元十年官撰農桑輯
要七卷元曾明善農桑衣食撮要二卷元王楙農書二十
二卷明周定王朱橚救荒本草二卷明徐光啟農政全書
六十卷明西洋熊三拔泰西水法六卷明鮑山野菜博錄
四卷我

朝乾隆八年

欽定授時通考七十八卷頒行天下凡八門曰天時曰土
宜曰穀種曰功作曰勸課曰蓄聚曰農餘曰蠶桑皆本諸

天道修人事以盡地力幽風無逸敦本重農之至意其備於是焉

邑人著述載於平定州志者有袁萬里律呂解增注黃鍾積算圖張璠靈樞經注日月五星志閻芝子史要略吳玉奏疏草高可久修綆錄詩文集皆明人書多散佚余所見者惟吳侍御奏疏草十篇曾爲校刊行世 國朝趙漢章先生宗文任湖南鄱縣綏甯縣令著訓俗編時竹編二卷皆有刊本余從其嗣君生員五雲鈔讀之皆民生日用切要之論也

先府君光祿公嘉慶年間曾爲伊犁將軍松文清公纂輯西陲總統事略十二卷徽郡程也園部郎刊刻復撮其要

爲西陲要略四卷西域釋地二卷又撰

皇朝藩部要略曰內札薩克曰外札薩克曰額魯特曰回部曰西藏凡十八卷又己庚編二卷均已刊行府君愛方山松泉之勝晚年自號訪山有訪山詩文集書史輯要隨筆諸書

余家平舒村在太安村南二里許縣志西北鄉十七所其一平安所轄一村曰太平距城三十里是太安平舒本一村也今平舒北有唐崇福寺寺有神功元年經幢規模宏壯意當時人煙稠密連延數里後乃析爲二村而縣志仍因其舊邑故山國此獨平坦故曰太平

平舒兩見漢書地理志代郡平舒勃海郡東平舒皆縣名

也吾州張蓀圃先生佩芳曰地名古今多同平定以宋太祖征河東首下之故名然功臣表有平定敬侯齊受地志西河郡下有平定晉武帝始置樂平郡然漢宣帝時有樂平侯霍山章帝名東郡之清爲樂平唐又於饒州之長樂置樂平壽陽晉始名縣而東晉又以淮南之壽春爲壽陽非詳加考核往往有以彼地之事引入此地唯孟以山形得名始自漢以來而亦未有同者見平定州志

嘉慶年間古城村農於斷厓下得貨泉古錢十餘甕又漢鏡一枚馬景廬俊修曾以所得古錢數百見贈景廬善醫卽古城人也道光十二年三月壽陽牧者掘土得唐安定梁君墓誌銘并序石刻完好余里居時聞此石已展轉數

手惜未見其文後視學江左邑侯鍾元甫錄文寄示詞雅

體潔其地名有飴露鄉段亭村山名有巨山皆可補正縣

志之闕誤作詩報之附記於此元黻執徐月在辰片石獲

自牧羊子乃唐梁君之墓銘太和七年殯於此輔國之孫

季淮子年十有一惠而美能諷孔文顏氏字苗而不秀童

烏似段亭村西巨山南飴露之鄉近壽水厥名曰春字曰

春春華未剪霜雪委乘羊戲馬人不見謝玉瓊珠誰所誅

不著撰人名氏劉生好古獻我侯劉雪巖霏邑諸生留意金石侯以尺書遺千

里金鐘既得地靈發壽諺云古城南古城北沒耳金鐘露半壁去年侯於縣治前竟得之乃金

大定天池復濬人文起方山頂天池將湮侯濬治之刻石紀事陽摩山銘大

鐘也二年丁未陽摩靈嵩記寶應元載古靈嵩寺新造功德堂記大樂元和六年

山功德銘文

山重修古楞伽寺碑記

神福

天祐四年丁卯神福山寺靈跡記

碑並峙是皆唐筆久

湮鬱我剏得之手民李

其芳善鑄字與雪巖同好

與我村北陀羅幢

余家

平舒村北崇福寺有唐神功元年石幢高丈餘八角三層上層蓮花頂已圯中層鐫陀羅尼經額周圍鐫十六大字

曰上爲皇帝陛下敬造佛頂尊勝陀羅尼幢其時武后臨朝所云皇帝陛下蓋謂武后上則謂中宗也然神功年號

猶系大唐不書周代當日人心可知已

手每摩抄心獨喜邑乘闕略遺金石

六十年來待編紀

壽陽縣志乾隆三十四年知縣仁和龔導江重修

我侯通博百

事理意在搜抉證前史宦游悵望碧夫容兀坐一齋如夢

耳

比年得吾邑碑塌所至別懸一室顏曰碧夫容齋取不吳蓮洋方山詩巉巖高捧碧夫容句意以寄鄉思

不

惜蠶蠟遠相投江上春來有雙鯉

馬首卽春秋之舊址宗艾疑上艾之故稱晉州之寨猶存

賀魯之城尙在古驛傳於韓句洞過載在水經鸞巖見諸

隋書鴉谷著於唐代簡子墓亦趙氏之九原程子窻乃宋
賢之逆旅不獨河有童子之號山以長者得名也他若龍
門龍潭芹泉柳泉甘草黃楊蓮花柏子雲煙作社水磨成
灘上曲下曲中曲墟里迴環東可西可中可澗阿幽邃南
燕竹北燕竹卽古之名州上解愁下解愁皆今之樂土頡

紇

村

城塌

村

奇字堪徵卻略

嶺

屋科

村

方言可證又不僅

幔仇之亭繇蔓之水標新故訓領異前聞也且陽摩靈嵩
之寺神福華嚴之洞崇福陀羅之幢大樂楞伽之碣並有
唐筆猶餘古風昭化院之像石文留趙宋燕周里之經塔
字溯金源稽之志乘挂漏殊多僻在榛芳摹搨絕少余旣
帶經負鋤時復懷鉛問字偶爾剏獲如結奇緣發漢甕之

錢買山許隱拾趙陵之瓦

趙簡子墓瓦
細者可爲硯

穿硯堪書所以流

連桑梓不能無餘慕焉

族姪元輔按字

王篆友按勘馬首農言記

洞過水 筠案洞是借字說文迴下云迴迭也是正字迴迭卽是通達史記倉公傳診其脈迴風注云言風迴徹五藏也然說文亦借洞爲迴宀部宕下云過也一曰洞屋是也

穀 案穀爲總名禾爲專名自是定論然說苑張中種穀卽呼禾爲穀說文芑白苗嘉穀藁赤苗嘉穀粟嘉穀實也禾嘉穀也爾雅釋艸芑白苗藁赤苗郭注皆好穀是漢晉人皆呼禾爲穀也特不見於經耳至於禾之爲總名也則穀字從禾黍稷秬稻之類穀名多從禾故七月之詩禾麻菽麥此專名也十月納禾稼則總名也竊惟制字之聖生

於北方禾爲日用所不可少故以之統率諸穀也

稽 說文稽禾稾去其皮祭天以爲席然則稽本秬稿之專名

稷 案毛詩言祭品率先黍稷后稷又以之名官知上古所重者稷也而王制言稷食菜羹則以之爲降食知後人嗜欲日開飲食日精也

只怕穀重種 安邱諺云不怕重查只怕重芽卽此意惟豆亦然故謂之調苗調苗則易茂且穀種赤苗則白青黃苗皆莠也易於施鋤

以手撥其瓣 案瓣當作穢見呂覽說文

拐麥 玉篇木部有杲拐手部無拐

鎌 說文作鎌

不如不點 點者種也安邱俗以耒種之者謂之耩以犁耩之以手下子謂之點

耐風 耐似當作能漢書云能風與旱

後復砣之 安邱亦呼爲砣獨腳耒則石砣一雙腳耒則如輪矣齊民要術所云三腳耒沂州南至徐州乃有之砣之事古謂之案說文案轆禾也

嫩 說文作嫵

耙 說文作𦉳安邱則鐵齒謂之𦉳以條平編木匡上謂之耩直隸道中所見則𦉳亦通名耩

安瓜 安邱同此語而其音則上聲如或壽陽語亦是上

聲則似當作措廣韵措烏敢切手覆也與安瓜之事相近
以手切去 切者蓋卽搯也說文新附字搯瓜刺也

切其正頂 安邱謂之打頭瓜之生而不苦者安邱謂之
稍瓜生苦熟甘者謂之甜瓜打頭時先稍瓜後甜瓜則可
顛倒之則稍瓜亦苦矣又菜園惟此一種菜乃可以爲種
若一園諸菜皆有當其花時蜜蜂采之若留爲種則形味
皆失其常此皆物理之不甚可解者

蒜 各篇中蒜屢見而不及蔥韭案說文葷臭菜也釋典
以葱蒜韭薺興渠爲五葷道家易興渠以芸薑皆謂其有
氣臭也惟薑芥辛而不葷筠嘗見甘肅之薺本如水仙花
種於敝邑以漸而小三年後直與葱同花葉皆同惟葉極

滑露所不能黏著故曰薶露葱韭雖無異可言而葱子之將成也其莖荏弱不以物楛柱之致其子至地來年必一子生數莖不中食架者皆一莖此亦老圃之所有事也

秋收萬石糧 唐李紳詩春種一粒粟秋收萬顆子萬與一對舉盈數耳其實一粒所收不止萬顆也穀之初生一粒一莖比其長也族生三四莖或五六莖矣稗之族尤盛俗名曰糝諺曰糝子有百口家眷

今年耕塉 塉似當作場玉篇場下云耕場廣韵同又有重文暘 農之打場也今年自地中起明年自地邊起耕不但欲地之熟亦資日之暴煥氣入地其肥加倍故耕不欲陰而風

大小三筓 筓當作腳三腳耨見齊民要術沂州府用之
安邱用獨腳耨雙腳耨至於耨字說文作耨見椹字下又
作屨

椎 安邱則椎之兩三次始運而之田

田無草萌 鋤之力不但去草實堅實好皆鋤力也安邱
鋤禾五六次以爲常斗粟可得六升五合米聞鋤九次者
得米九升矣以無秕而糠又薄也豆鋤四次者來年種之
雖堅地大雨隴背皆平力能負土而出綠豆鋤次過多則
不可爲飯然以之作粉則較少鋤者多太半 下隰口訣
曰一耕二鋤三糞

蘿蔔

蔔亦作菹古服蔔同音故關雎服側爲韻易服牛

乘馬說文引服作犗紫花菘卽蘿蔔爾雅作蘆葩郭注葩宜爲菴

鉏 鉏柄曰樞見說文安邱皆呼鉏樞

犁 說文作犂耕也此古義也玉篇犁耕具也此後世義也古人耕地但知用一金卽今之鑿也故須耦耕漢人於鑿上再加一金卽今之犁也然其時鑿亦謂之犁說文玉部瑁下云犁冠是也鑿乃有冠以冒於耜犁側置鑿上所覆土未嘗有冠以此知之

鋤 爾雅釋器剡謂之鋤郭注皆古鋤插字言剡爲古鋤字也然剡仍是譌字說文斗部斛引爾雅斛謂之鋤

古艾從草 案艾是借字說文又或作刈芟艸也是正字

爾雅釋詁又治也凡詩書訓治之又皆斲之省文

斲古之鉄也其木質謂之橐礎礎亦作椹砧說文但作甚

礪古作厲底厲能錯磨故得嚴厲之義爲借義所奪乃加石作礪以別之

杓當作捌說文新附捌字引方言云無齒杷

比之手槌槌字不知何字之誤槌乃瑚璉之璉之正字
槌乃連之俗字然是漢世俗字連負擔也既借連爲聯乃
加才以別之槌槌二字古人亦竝借輦字爲之

條帚亦作苕案苕帚爲正憶出左傳杜注

簾卽篩之古字也今音隨字變矣亦作筵譌作筵謂以

玉爲柱者從爲之辭也

謂之積苦 爾雅白蓋謂之苦又儀禮寢苦枕函則借字也說文稜喪藉也

墮曰竇 墮當作橢見說文木部 儀象考成橢圓形又謂之鴨蛋形

塘猶堰也 說文無塘字借唐爲之阜部隄唐也是也毛氏刊改爲塘詩中唐有甃蓋卽爾雅釋宮廟中路謂之唐也唐祇是途而用爲陂塘者自障水言之謂之陂自其岸可通行人言之謂之塘陂塘蓋是一物

轆轤 亦作輶轤竝見廣韻一屋又作橈轤見集韻一屋地穴出水也 地穴似當作穴地爾雅釋水邢疏引說文

井鑿地取水也今本無此句

汜勝 漢書藝文志汜勝之書似勝之爲名此或用左傳
晉重例

風莫風 莫蓋兮猗之類語詞也似可從俗作麼

驚蟄聞雷米如泥 驚蟄必雷雷不必聞惟雉聞之而鳴
先輩說夏小正雉震响語

清明栽蒜 安邱天氣煥冬種蒜而五月出之故曰夏至
不鬪蒜必定散了辨言夏至以後蒜瓣不復附麗其根也
九股八格杈 格依說文當作格然庾信小園賦枝格相
交祇作格安邱芝麻止兩種名大八杈者多枝名霸王鞭
者無枝

芒種植黍生芽 魯頌植穉菽麥毛傳先種曰植後種曰穉說文植早種也穉幼禾也案此乃百穀早晚之通名非菽麥之專名也臨淄人猶呼早麥曰植麥安邱不聞此語矣

小暑喫角角 筠聞此語誠作角音而其字則當作莢說文莢艸實唐韻古叶切安邱呼青黃白黑豆之莢皆曰夾呼豇豆之莢則曰角呼牛羊角亦如夾也頃又檢得廣雅曰豆角謂之莢

油粒飽湛也 湛似當作綻綻坼裂也說文果孰有味亦坼是也但五穀粒雖極大亦未嘗坼耳 案此語似指豆而言故曰油且頭伏始鋤亦必是豆若是秬穀則安邱諺

云立夏三日見鋤田立夏十日徧鋤田不能待頭伏也

頭伏蘿蔔末伏菜 安邱諺云頭伏蘿蔔末伏蕎麥蕎麥地中未有不帶小蔓菁者小蔓菁祇可旨蓄御冬非都中所謂大頭菜也安邱別之曰大蔓菁

煞 道家之殺字也

先社後秋分 安邱諺曰先分後社有糧無人借先社後分糧食貴如金案兩地諺語同者極多獨此一事正相反背

九九 安邱諺一九二九不出手三九四九凌上走五九六九沿河看柳七九六十三路上行人把衣擔八九七十二黃牛徧地是九九八十一家裏送飯坡裏喫凡此類語

各據本地之寒煥言之必不齊同也又曰春打六九頭七
九便使牛春打五九尾凍殺三千火燎鬼案此特以驗寒
煥耳乃作此很語誠鄙諺也

先餞牛 月令季春餞獸之藥作餞說文則作菱

穀宜稀 安邱諺稀穀秀大穗來年長好麥蓋收穀之後
其田卽種麥也

又匙上有火 匙當作齒方言有無齒杷安邱語曰鋸口
有火刀頭有水凡接樹者必以刀斷之若斷之以鋸不能
生也

麥秀五節 五似四之譌麥秋種夏熟受四時全氣故四
節四葉

雲南鉤風北鉤雨 安邱語上鉤風下鉤雨

早燒陰晚燒晴 安邱語早燒不出門晚照行千里又曰
早上燒晚上澆

一霧十日晴 安邱語久晴大霧必陰久雨大霧必晴

晚雨下到明早雨一日晴 安邱亦有此語又曰開門風
閉門雨亦謂晨風竟日暮雨竟夜

八十老兒沒見東雷雨 安邱有之然是古語矣今屢屢
見之

黑豬過河 一天星月而黑雲橫截天河是雨徵也

忽雷雨連三場 安邱語雷雨三下飭與此同意說文飭
晝食也安邱謂午飯爲飭飯因謂正午爲飭午日夕爲下

餉

博 玉篇廣韻有博甄甌三字皆可用小雅無羊傳瓦紡博也經典釋文作專說文同古文假借似難用

摘 見種植篇

巷謂之合朗 合與巷雙聲朗與巷之今音疊韻唐韻巷胡絳切絳字以古音讀之則與巷之古音合以今音讀之則與巷之今音合京師謂之衚衕正是巷之古音切腳也下文棒謂之不浪其誤同此共聲丰聲皆在東冬部良聲則陽唐部

虹謂之絳 案此是轉音非改字也廣韻四絳絳與虹同音古巷切古音則絳紅同戶工切

蕩根 案此別自一物今謂之蕩帶者是也大而短者謂之蕩細而長者謂之蕩帶帶生蕩蕩生花葉帶之上不能生花葉也爾雅釋草謂之密

鬼稭稭 此乃去年遺種自生者本以落而生故結實仍落卽如麥初登場必有自落之粒欲來年麥早熟卽以此自落者至秋種之可以早得接濟然落於畝中亦多經碌礮而得者卽種之不落亦同此理

謙 當作鹵見說文

牛 牛於六畜中最易肥故諺曰年驢月馬十日牛安邱餒牛亦用麥糠然淘汰必精設有黃丹則牛病矣

多虛日也 此解似誤虛從止虍聲故說文云虛大止也

案人之作室必依止虛故名邨曰虛後人分別之作墟遂專爲空虛字矣市在邨落中故曰趁虛也

安邱王筠曰在昔周公敝無逸曰先知稼穡之艱難孔子俾周公之才之美而風雅所載周公之作反覆田事津津若有餘味唐魏之風言稼穡樹藝諸詩多出於在位之君子孔子刪詩獨有取焉壽陽古馬首邑爲晉祁氏七邑之一其俗勤儉務農至今猶有古風淳甫夫子幼從京宦弱冠入官未嘗親田事而其所著馬首農言十四篇諄諄於土物之宜耕耘之候纖悉必備蓋本詩書艱難勤儉之訓而以約旨卑思隱其詞於一邑之中信乎士食舊德農服先疇祁大夫之遺澤長久引而勿替也筠家帶經而鉏者

十餘世勗見此書逢其故業故樂而按之按畢並跋